



UNIVERSITÄTS-
BIBLIOTHEK
PADERBORN

Universitätsbibliothek Paderborn

Conciliorvm Omnivm Generalivm Et Provincialivm Collectio Regia

Ab anno DLXXVII. ad annum DXC.

Parisiis, 1644

Epistola XV. Gregorii Papae I. Ad Episcopos Dalmatiae. Vt nulli in
Salonitana ecclesia sine sua permissione manus imponant: & de Maximi
praesumptione.

urn:nbn:de:hbz:466:1-15221

ne vel nostræ commendationis inueniaris tramitem neglexisse, vel minus exhibuisse quam tuus exigit ordo pauperibus: quia & nos ei annuum quid de nostra ecclesia dari fecimus, vt eiusdem operis, quod te hortamur exhibere, participes esse possimus.

EPISTOLA XV.

GREGORII PAPÆ I.

AD EPISCOPOS DALMATIÆ.

Vt nulli in Salonitana ecclesia sine sua permissione manus imponant: & de Maximi præsumptione.

Gregorius vniuersis episcopis per Dalmatiam.

OPORTVERAT quidem fraternitatem vestram diuini respectu iudicii, clausis carnalibus oculis, nihil quod ad Deum pertinet a recta mentis intentione omittere, nec cuiuslibet hominis faciem rectitudini iustitiæ præponere. Sed postquam mores vestri ita sunt sæcularibus traducti negotiis, vt obliuiscetes omnem sacerdotalis in vobis honoris tramitem, cunctumque superni metus intuitum, non quid Deo, sed quid vobis placeat studeatis explere, necesse habuimus hæc ad vos districtiora specialiter scripta transmittere: quibus ex beati Petri principis apostolorum auctoritate præcipimus, vt nulli penitus extra consensum permissionemque nostram, quantum ad episcopatus ordinationem pertinet, in Salonitana ciuitate manus præsumatis imponere, nec quemquam in ciuitate ipsa aliter quam diximus ordinare. Quod si contra hæc quidpiam vel sponte vestra, vel a quolibet coacti præsumpseritis vel tentaueritis agere, decernimus vos a dominici corporis & sanguinis participatione priuatos, quatenus ex eadem vobis ipsa attractione vestra, vel voluntate transgrediendæ præceptionis nostræ, a cælestibus mysteriis alieni sitis, nec is quem ordinaueritis habeatur episcopus. Nos namque nullum cuius vita reprehendi potest, ordinari temere volumus. Quod si Honoratus diaconus indignus ostenditur, de vita moribusque eius qui electus fuerit nobis renunciari volumus, vt quidquid in hac re agendum est, cum consensu nostro salubriter permittamus im-

pleri. Confidimus enim in omnipotentem Dominum, quia, quantum ad intentionem nostram pertinet, nunquam quod nostram grauare possit animam, nunquam finemus fieri quod vestram grauare possit ecclesiam. Sin vero in qualibet persona ita voluntarius omnium consensus accesserit, vt auctore Deo digna sit, & non sit qui ab eius ordinatione dissentiat, hanc a vobis in eadem Salonitana ecclesia ex præsentis epistolæ nostræ concessa licentia volumus consecrari: excepta dumtaxat persona Maximi, de qua ad nos multa mala perlata sunt: quæ si ab appetitu maioris ordinis non cessat, restat, vt arbitror, quatenus subtiliter discussa, ipso quoque, in quo est, officio careat.

EPISTOLA XVI.

GREGORII PAPÆ I.

AD CYPRIANVM DIACONVM.

De ministeriis vasisque ecclesiarum per Siciliam
recolligendis.

Gregorius Cypriano diacono rectori Siciliae.

PERVENIT ad nos diuersos Italiae sacerdotes Siciliam confugientes, plurima secum ecclesiarum suarum ministeria detulisse, eaque siue defunctis eis, siue male dispergentibus, prope omnia deperiisse. Qua in re moti hortamur dilectionem tuam, quatenus transmittens per omnia Siciliae loca, sicubi vasa sacra resque ecclesiarum positas incaute repereris, ea cum summa distictione recolligi facias, atque adunatas sub notitia testium suscipias, susceptasque apud singulos episcopos ecclesiarum deponas, apud quos, vsque dum pacis tempus exposcerit, iuuante Domino, debeant tutissime conseruari. Omnium autem rerum ipsarum non solum desuscepta, eos qui eas tradunt percipere volumus, sed etiam a te notitias earum subtiliter retineri, vt dum necesse fuerit, ex hac cautela, iuuante Domino, possint ab iis quibus traduntur sine imminutione restitui.